

善本書室藏書志

善本書室藏書志卷二十五

錢塘丁丙松生甫輯

集部四

劉賓客文集三十卷外集十卷

精鈔本

稽瑞樓藏書

正議大夫檢校禮部尚書兼太子賓客贈兵部尚書劉禹錫

禹錫字孟德中山人貞元九年進士又中博學宏詞科後由和州刺史入爲主客郎中薦爲翰林學士遷太子賓客加檢校禮部尚書唐書有傳陳氏書錄解題云原本四十卷宋初佚十卷宋次道哀其遺詩四百七篇雜文二十二篇爲外集未必皆十卷所逸也其雜文二十卷詩十卷明時曾有利本名中山集流傳甚稀此爲稽瑞樓藏本鈔寫極工略有校正有柏溪一印

呂衡州文集十卷

舊鈔校本

郁泰峰藏書

朝議郎使持節衡州諸軍事守衡州刺史上騎都尉賜緋魚袋呂

溫撰

按溫字和叔一字化光河中人貞元十四年進士官至刑部郎中兼侍御史謫道州刺史徙衡州卒唐書有傳集爲劉禹錫編次前有序文後有柳宗元誄此十卷已非禹錫舊次馮已蒼從絳雲借得前五卷又買得後三卷俱宋本六七兩卷仍闕取英華文粹所載者照目寫入又第二卷間砧以下十五首宋本所無按陳解元書棚本增入又顧千里跋云衡州集前五卷係吳方山舊鈔本後五卷從正嘉時舊鈔本補全篇目次第與馮已蒼本悉同且第六第七兩卷獨全中如韋武神道碑柳夫人誌則舉世莫傳此本有之可稱祕笈矣有曾在上海郁泰峯家一印

呂叔和文集十卷

舊鈔本

錢天樹藏書

唐朝議郎使持節衡州諸軍事守衡州刺史上騎都尉賜緋魚袋

呂溫撰

前有彭城劉禹錫序後有柳宗元故衡州刺史東平呂君誄一卷賦詩二卷詩三卷書序四卷表五卷表狀六七卷誌銘八卷銘文九卷頌讚十卷雜著末有屏守居士題識烏絲闌紙鈔手勾淨有錢天樹印是肥樓中祕笈兩印

唐張司業詩集八卷

明刊本

國子司業張籍文昌翰林學士中書舍人張洎編輯

籍字文昌蘇州吳縣人也貞元十五年及第歷官太祝祕書郎國子博士水部員外郎國子司業陳振孫書錄解題云張洎所編者名木鐸集十二卷後番陽湯中集司業詩集世所傳者歷陽盱江二本編次不倫字亦多誤余家藏元豐八年寫本以樂府首卷絕句繫後既有條理古詩亦多二本十數首今合三本校定八卷復錄退之樂天夢得酬贈諸篇附後差完善可觀近

席氏刻者卽是也此亦八卷本卷一五言古詩七言古詩卷二五言律詩卷三五言排律卷四七言律詩卷五五言絕句卷六七言絕句卷七樂府卷八雜詩聯句後有跋云辛酉歲余移告家居因合歷陽盱江及湯侍講本校之得其樂府古風近體詩共七十九首錄於毘陵蔣氏刊本後錯字亦稍爲正之惜不署名或名列前序已失也是蔣氏本初止六卷因增入樂府等詩而爲八卷也刻法頗舊題記亦善決非俗本也

歐陽行周文集十卷

明刊本

歐陽詹字行周

詹泉州晉江人舉進士官四門助教率其徒伏闕下舉韓愈爲博士年四十餘卒愈爲辭哀之是集明刊小字本前有李貽孫序顧廣圻思適齋集跋此書云第五卷韓城西尉廳記云列縣出於千乃文集最妙處文苑八百六文粹七十三於千上多五

字皆大誤舊唐志貞觀十三年定簿歷一千五百五十一新書志開元廿八年戶簿帳縣一千五百七十三行周此記作於貞元十五年已非復貞觀開元之盛其決無五千縣之多明矣宜据集剛苑粹衍字而何義門校葉鈔反据以添集何耶

唐歐陽先生文集八卷附錄一卷

明舊歷刊本

韓履卿藏書

唐國子監四門助教閩歐陽詹

前有萬歷丙午南京戶部四川清吏司郎中侯官曹學佺序稱癸卯冬與徐興公遊溫陵之石室乃行周先生讀書處也越三年興公攜先生集於金陵謀更梓之先生至性孝友人無間言惟太原函髻一節議者未有定論竊謂關試而後薄遊太原先生未入仕也卽仕矣而唐時未嘗置禁也他如樂津北樓句聞唱涼州詩皆因偶見錄之形諸謳詠其以爲鍾情感溺一慟而亡者好事之譚也韓之哀辭曰貞元八年春與詹同登第後詹

數歸闕及十五年爲助教率徒伏闕舉予爲博士如是則先生仕之日少而歸之日多非戀戀於膝下而二尊人者迫之使出耶又安見其爲溺於婦人女子之壹鬱踰年以死也故與公編次先生文自貞元五年曲池至十五年韓城縣西尉廳記止歷歷有徵并宋祁文藝傳以下附錄於左云次李貽孫序康熙己丑義門何焯借葉文莊公家鈔本改正數處咸豐初韓崇臨何批本及跋語於寶鼎山房有南陽學子韓崇校讀兩印韓崇字履卿自號南陽學子元和人家有寶鼎山房儲藏祕本甚多爲桂船尙書葑之哲弟

李文公集十八卷

明成化刊本 怡府藏書

唐山南東道節度使檢校戶部尙書李翱字習之

翱隴西成紀人貞元十四年進士唐書有傳趙訪東山存稿稱此集十有八卷百四篇江浙行省參政趙郡蘇公所藏本與唐

藝文志卷數合此成化乙未廣西左布政使王融何宜序云邵武郡守西蜀馮君師虞以唐隴西李文公所爲文十八卷凡一百三首命工鈔梓以傳較原本闕一篇也有明善堂鑒藏書畫記安樂堂藏書記張幼岑各印

李元賓文集五卷

鮑氏知不足齋鈔本

陳仲魚校藏

唐李觀撰觀字元賓趙州贊皇人李華之從子貞元八年進士官至太子校書郎年二十九卒新唐書有傳韓昌黎誌其墓是集冠以大順元年給事中陸希聲序前三卷卽希聲所編後二卷爲外編蜀人趙昂增編今闕上王侍御書一篇末有東里盧文弼跋云今年歲在強圉作噩月紀王正故人子陳燧相見武林借予傳錄攜來金陵尙未脫手何期惡耗陳君天亡年優元寶殆亦無幾今觀終卷略敘所由有印曰知不足齋鈔傳祕冊曰仲魚手校曰鮑讀黑格楷書精湛奪目

李元賓文編五卷

鈔校本

李觀元賓

前有大順元年十月給事中陸希聲序云元賓不古不今卓然
自作一體激揚發越若絲竹中有金石聲每篇得意處如健馬
在御蹀躞不能止其所長如此自廣明喪亂天下文集略盡予
得元賓文於漢上惜其或復磨滅因條次爲三編外編二卷題
蜀人趙昂編其上王侍御書一篇已缺卷之首葉紫筆云辨曾
參不爲孔門十哲論見文粹三十五卷此本無之並補錄見錯
論一篇餘則校補甚多又墨筆云嘉慶丁卯正月九日以何義
門校本勘校訖又有朱筆校改者皆不署姓名也

孟東野詩集十卷

明宏治仿朱刊本

山南西道節度參謀試大理評事平昌孟郊

郊洛陽人初隱嵩山稱處士貞元十二年進士年五十矣調溧

陽尉有投金灘郊間往命酒揮琴徘徊賦詩曹務多廢縣令白
府以假尉代之分其半俸辭官家居李紉薦於興元節度使鄭
餘慶奏爲參謀試大理評事終黃蘗圖百宋一厘藏有北宋蜀
本每葉二十四行行二十一字陸存齋儀顧堂續跋載藏汲古
閣影宋精本題銜作平昌不作武康與此同後有宋敏求題題
後有臨安府棚前北睦親坊南陳宅經籍鋪印一行前有目錄
每葉二十行行十八字此本亦前有目錄後有宋敏求題每葉
二十行行十八字惟無臨安府棚前一行耳其爲翻雕棚本無
疑重刊序已缺一葉中有提學楊按察憲庵先生以全集不多
見出藏本屬商州梓木行之惟時同知於君睿奉命惟謹閱兩
月工完先生欲戡識其後此本蓋宏治時楊公一清刊於陝西
商州者

孟東野詩集十卷

明嘉靖刊本

唐山南西道節度參謀試大理評事武康孟郊著明進士文林郎知武康縣事無錫秦禾重刻

前有嘉靖丙辰秦禾重刊序稱宋學士敏求摘去重複及體制不類者得五百十一首彙爲十卷宋景定間武康令國材成德用宋本刻之襲得其集於都氏元敬因其宋刻而寶之癸丑冬承乏武康繙閱邑志國令無聞焉豈宋季師旅方興忽不及錄歟爰令杭士趙伯觀正譌重鋟并錄國材原序及宋敏求序彙印極古雅

唐賈浪仙長江集十卷

明仿宋刊本

潘功甫藏書

曹州司倉參軍范陽賈島浪仙撰

島之爵里已具題銜初爲浮屠名無本留長安因吟落葉滿長安思屬聯不得忽以秋風吹渭水爲對喜不自勝唐突大京兆劉棲楚被繫笏釋後以僧推月下門又欲作僧敲煉未定誤衝

韓京尹左右擁至馬前韓駐久之曰敲字佳遂結爲布衣交去
浮圖舉進士不第坐謫責授長江主簿遷普州司倉臨死之日
惟病驢古琴而已晁氏稱長江集十卷詩三百七十九首劍客
一詩明代選本皆作今日把酒誰有不平事舊本才調集作
誰爲馮舒以有字爲後人妄改此本仍作誰爲前有目錄無序
跋尙屬舊帙有句吳潘氏鳳池園鑒藏潘曾沂字功甫蘇州臨
頓里人兩印曾沂字功甫號瑟庵吳縣人嘉慶丙子舉人官內
閣中書著述甚富

賈浪仙長江集七卷

明刊校宋本

葉氏蕉竹室藏書

唐長江尉賈島著

賈集宋刻每葉二十行行十八字藏揚州阮氏汲古影宋本則
藏士禮居蓋卽書棚本也此書七卷尾有奉新縣刊四字乃江
西本卷一五古卷二三五律卷四五排卷五七律卷六五絕卷

七七絕有葉氏萊竹堂藏書葉子寅印張紹仁印學安等印黃
蕓圃手跋謂子寅依宋本校者也

李長吉詩集四卷外集一卷 明宏治刊本 葉子寅藏書

隴西李賀

賀字長吉鄭王之孫也以郡望題隴西實家昌谷故亦稱昌谷
集七歲能辭章韓愈皇甫湜過其家使賦詩援筆成高軒過二
公大驚賀通眉長爪能疾書出命小奚背古錦囊有所得輒投
囊中暮歸探囊書之其母曰是兒要嘔出血乃已死年才二
十七李蒲綴其歌詩半爲賀表兄樊榘而杜牧序述沈公子明
書云賀嘗授我平生所著歌詩爲四編凡二百三十三首似集
爲賀所手定豈授沈者爲少時作其表兄樊榘者乃中年作耶
郡齋讀書志載四卷外集一卷與此本合前載杜牧序又至元
丁丑復古堂識云長吉詩舊藏京本蜀本會稽本宣城本互有

得失獨上黨鮑氏本爲勝今定以鮑本而參以諸家書前復有
宏治壬戌汝甯劉淮序云安慶有是集字刻率易宗敬守甯翻
刻於謝眺樓黃楚圖定爲明翻元本有葉氏藏書葉子寅印又
有藏儀墨農家功甫借觀石雲諸印

唐李長吉詩集四卷

明刊本

唐隴西李賀長吉甫著

前載杜牧撰唐太常寺奉禮郎李賀詩歌集敘李商隱撰李賀
小傳首有廣平王家瑞凝貞刻書序家瑞戊戌進士此本雕印
極精附製書雅意五條按鮑氏本有後卷京師本無後卷黃氏
士禮居所藏金時碣石趙衍刊本乃四卷此豈依其第耶有寶
古堂司馬氏兩印

絳守居園池記注一卷

影寫明宏治刊本

唐刺史樊宗師撰漢陽趙仁舉注金華吳師道正誤補遺

唐長慶三年宗師官絳州刺史卽守居構園池自爲記文止七百七十七字僻澀不可句讀雖有自釋注亭榭之名仍不盡可解王晟劉忱二注久佚元趙仁舉補注之吳師道又爲補之許謙仍以未盡又爲補正而師道更因謙本重加刊定復爲之跋此本前有景德元年承奉郎將作監通判絳州軍事孫冲撰序後有金華張樞跋語明宏治七年直隸池州府知府前南京大理寺正仁和陳良器刻書序

沈下賢文集十二卷

明謝氏小草齋鈔本

周櫟園藏書

吳興沈亞之下賢

前有無名氏元祐丙寅十月一日序云公諱亞之字下賢吳興人元和十年登進士第歷辟藩府嘗游韓愈門李賀許其工爲情語其後杜牧李商隱俱有擬沈下賢詩則當時聲稱甚盛而存於今者舛錯謬脫文漏句十有三二頃得善本再加校駁

因命工刻鏤云云自來藏書家皆屬寫本惟見朱氏結一廬有一明刊者此爲小草齋鈔本必同時傳錄目錄外又有每卷之目接於本文猶存舊式後錄文獻通攷一則萬厯丙午徐燊一跋云鈔自焦太史者有謝在杭家藏書長印周亮工印曾爲大梁周氏所藏夢廬借觀諸印周亮工字元亮號櫟園祥符人崇禎庚寅進士入一國朝官戶部侍郎著有賴古堂集

李文饒文集二十卷別集十卷外集四卷

明嘉靖天啟刊配本
不烈張紹仁舊藏

黃

右爲唐李德裕撰大題在下題會昌一品制集版心題李衛公文集前有桂營都防禦觀察處置等使滎陽郡開國侯鄭亞序云特進太子少保分司東都衛公合武宗一朝冊命典詰奏議碑贊軍機羽檄凡兩帙二十卷署曰會昌一品制集紀年追聖德也書位旌官業也歲在丁卯亞自左掖出爲桂林公書至自洛以典詰制命示於幽鄙且使爲序宋刊本每半葉十三行每

藏書志卷二十五

八

行二十二字一至十卷常熟陳子準藏吳門黃蕘圃校錄於嘉靖刊本之上卽此本也今僅存卷六至卷十凡五卷餘則以汪魚亭藏嘉靖本配之仍闕文集卷十一至十七別集卷六至外集卷四則以天啟間茅兆河刊本足之與陳振孫書錄解題所載之永嘉及蜀刻三十四卷本合孫淵如云茅刻雖加評點刻不甚精然未改宋本舊式亦可寶藏且有吳郡張紹仁校讀異書齋校正善本二印蕘圃跋此自署抱守老人余之配合殘闕亦猶是耳

李文饒公集二十卷別集十卷外集四卷

明袁州刊本

馬笏齋藏

此明袁州府知府鄭惇刻本每卷篇目連接正文猶存舊式有東吳後學陸時化印朱敘海峯馬玉堂笏齋等印

元氏長慶集六十卷

明翻宋本

唐元稹撰稹字微之河南人九歲工屬文元和初對策第一拜

左拾遺遷中書舍人翰林承旨拜同中書門下平章事除武昌
節度使唐書有傳積有長慶集一百卷及小集十卷右爲宋宣
和甲辰建安劉麟應禮撰序稱微之有盛名於元和長慶間觀
其論奏莫不切當時務詔詰歌詞自成一家文雖盛傳一時厥
後沒亦不顯僕之先子尤愛其文曉夕玩味稱歎不已謹募工
刊行庶幾元氏之文因先子復傳於世後附集外文章二首乾
道戊子知紹興府兩浙東路安撫使鄱陽洪适景伯書其後云
微之以長慶癸卯鎮越大和己酉召還坐嘯是邦閣六寒暑集
之傳於今者惟閩蜀刻本爲六十卷三館所藏獨有小集其文
蓋已雜之六十卷中矣予來踵後塵相去三百三十餘年乃求
而刻之寅之蓬萊閣蓋肇於劉之闕本而續於洪之越本也是
帙又爲明嘉靖壬子仲春東里董氏用宋本翻雕於茭門別墅
者總目外每卷仍各列目

藏書志卷二十五

九

白氏文集七十一卷

東瀛刊本

白居易撰居易字樂天太原下邳人貞元十六年補校書郎元和中召拜翰林學士歷左拾遺貶江州司馬轉中書舍人知制誥除杭州刺史召還遷刑部侍郎會昌初致仕卒居易自杭州刺史還排纂其文成五十卷號長慶集浙東觀察使元稹爲之序又成後集二十卷自爲序會昌五年重記云集有五本一在廬山東林寺經藏院一在蘇州禪林寺經藏內一在東都勝善寺益塔院律庫樓一付姪龜郎一付外孫談閣童各藏傳後其日本新羅諸國及兩京人家傳寫者不在此記末有陶穀述龍門重修白樂天影堂記此本序後有目錄每卷首題曰白氏文集卷第幾每半版九行行十六字目錄後題十冊共七十卷總三千五百九十四首爲日本元和戊午七月那波道圓重刊元和戊午當明萬曆四十六年經籍訪古志據讀書敏求記所謂

廬山本者蓋卽此本其實唐會昌間已流入日本禮失求野益信然矣

章孝標詩集一卷章碣詩集一卷

明正德依宋刊本

直齋書錄解題章孝標及章碣皆集一卷孝標元和十四年進士祕書省正字碣錢塘人孝標之子登僖宗乾符進士第有異才嘗草創詩律於八句中足字平側各從本韻如東南路盡吳江畔正是窮愁薄暮天鷗鷺不嫌斜兩岸波濤欺得逆風船偶逢島寺停帆看深羨漁翁下釣眠今古若論英達算鴟夷高興固無邊自稱變體今詩中無之則遺佚尙多也

唐張處士詩五卷

明正德依宋刊本

劉容峯藏書

張祐字承吉

宋臨安棚北陳氏書肆刊唐人小集大率半葉十行行十八字此爲明正德間所刊行款悉同當出棚本且有彭城伯子空翠

閣藏書印兩記可寶也按祐南陽人寓姑蘇樂高尚稱處士不業程文元和長慶間爲令狐文公器許嘗草薦表以詩三百首獻於朝上召元稹問祐之詞藻上下稹曰祐雕蟲小技壯夫不爲若獎激太過恐變陛下風教由是寂寞而歸爲詩自悼云賀知章口徒勞說孟浩然身更不疑後卒於丹陽隱居又甫里先生集附錄顏萱過張祐丹陽故居云萱與張處士祐世家通籍尚憶孩稚之歲與伯氏嘗承處士撫抱之仁曰管輅爲神童期孔融於偉器光陰殂謝二紀於茲適經其故居已易他主訪遺孤之所止則距故居之右二十餘步荆榛之下華門啟焉處士有四男一女男曰椿兒桂子椅兒杞兒問之三已物故唯杞爲遺孕與其女尚存欲揖杞與言則又求食於汝墳矣但有霜鬢而黃冠者杖策迎門乃昔愛姬崔氏也與之話舊歷然可聽嗟乎葛屨練裙兼非所有琴書圖籍盡屬他人又云橫塘之西有

故田數百畝力既貧瘠十年不耕惟歲賦萬錢求免無所嗚呼
昔爲穆生置醴鄭公立鄉者復何人哉

樊川文集二十卷別集一卷外集一卷

明刊宋本

張佩兼藏書

唐中書舍人杜牧字牧之撰

牧京兆人大和二年登進士第官至中書舍人唐書附杜佑傳
侍郎崔郾爲主事太學博士吳武陵進謁曰侍郎爲明君選才
僕向見文士十數輩共讀一卷文書覽之乃杜牧阿房宮賦其
人王佐才也因出卷播紳朗誦之郾大加賞曰請公與狀頭郎
曰已得人矣曰不得卽請第五人更否則請以賦見還辭容激
厲郾曰諸生多言牧疏曠不拘細行然敬依所教不敢易也是
集二十卷卽牧之外甥裴延翰所編並爲序言卷首冠阿房宮
賦有以也晁氏讀書志又載外集一卷而王氏居易錄云宋本
外集之外又有續別集三卷此獨有別集一卷有熙甯八年田

榮序與王氏所見當另一刻也每葉二十行行十八字平津館鑒藏書記中所載卽此耳有張載華印佩兼兩印

溫庭筠詩集七卷別集一卷

錢遵王稿鈔宋本

庭筠字飛卿舊名岐井州人宰相彥博之孫舉進士數上不第仕終國子助教有漢南真稿十卷握蘭集三卷金荃集十卷詩集五卷學海三十卷採茶錄一卷乾牋子一卷文獻通攷載溫庭筠金荃集七卷別集一卷與此合常熟瞿鏞田裕齋書目云宋本名溫庭筠詩集卷一湘宮人歌下卽次黃曇子歌不在別集末與此又合舊爲述古堂寫本每半葉十二行二十一字詩題低五格遵王題曰世傳溫李爲側豔之詞今誦其雞聲茅店月人迹版橋霜及魚鹽橋上市燈火雨中船諸句豈獨以六朝金粉爲能事者解對金跳脫正不必讀南華第二篇矣

增廣音注唐郢州刺史丁卯詩集二卷

明宏治刊本

怡府藏書

刺史許渾字仲晦撰信安後學祝德子訂正

渾丹陽人太和六年進士爲當塗太平二縣令以疾免久之起爲潤州司馬拜監察御史歷虞部員外郎睦郢二刺史後抱病退居丁卯橋卽舍暇綴所作因以名集此爲元大德丁未金華王璿希古序其首明宏治七年鎮江知府洪洞鄭傑刻而跋於後塘序後刊會稽陸游題古潤丁卯橋許渾故居詩云裴相功名冠四海許渾身世老漁樵若論風月江州主丁卯橋應作午橋有怡王之寶明善堂覽書畫印記安樂堂藏書記三印

唐求詩集一卷

明仿宋刊本

求成都人絕念鼎鐘放曠疏逸酷耽吟詠氣韻清新有所得以稿撚爲丸投大瓢中卧病投瓢於錦江望而祝曰茲瓢儻不淪沒得之者始知吾苦心耳瓢泛至新渠有識者見曰此唐山人詩瓢也扁舟接之得詩數十篇今行於世書錄解題載唐求集

一卷與顧非熊同時藝文志不載按黃堯圃士禮居藏書說有云延合季氏宋版目中載之書僅八葉計詩三十五首與韋蘇州集同一行式皆臨安府棚北大街睦親坊南陳宅書籍鋪刊行者此本無不吻合殆仿書棚本覆刊也

黎嶽詩集一卷附錄一卷

明影寫正統刊本

淡生堂祁氏藏書

唐建州刺史李頻德新

刺史壽昌人大中八年登進士第爲武功令拜侍御史遷都官員外郎工部郎中出刺建州善政被人旣卒於官民思其德構廟黎山尊山爲嶽集亦因之以名集初爲眞德秀得於三館嘉熙間金華王埜始鋟諸版元元貞大德間喬孫邦材明永樂十三年河南師祐正統七年嚴陵張瑛並爲重刊附錄歷朝廟祀敕書碑記及彭森一序邵文龍一跋此卽從正統本影寫也有山陰祁氏藏書之章澹生堂經籍記曠翁手識禦兒呂氏講習

堂經籍圖書汪魚亭藏閱書諸印

梁嶽詩集一卷附錄一卷

明影寫至元刊本

唐建州刺史李頻德新

首冠嘉熙三年金華王楚序稱公詩百九十五篇刻於建州以報公德大德元年壽陽呂師仲序稱生爲牧沒爲神建人慕之而有梁山之祠睦人慕之而有壽昌之祠余守睦適衢有頑盜出沒壽邑余捕而就擒因謁祠觀像詢及公之詩有十七世孫愛山新鋟諸梓可謂善繼志者也又有里人邵文龍題跋又元貞丁酉睦州裔孫邦材序稱夢公曰余詩舊刻廟中散失無存若惡得無情覺而白之郡博士復刊之至元後丁丑郡進士福建漕幕佐揆張復序稱公有孫會同由睦來謁建祠袖詩見余請敘云云後附錄紹興五年碑紹興中封公號慶元中封王號嘉泰中封王號開禧中封王號淳祐中封王號元統三年張復

撰有元重封黎嶽廟碑末有十七年甲申春三月容所氏從元刻本影寫夏五月裝池六月林宗同校勘殆崇禎末年所影寫也

文標集三卷外錄一卷

精寫本

唐袁州盧肇子發

前有袁州教授南城童說序稱子發諱肇姓盧氏宜春人唐會昌二年以詞賦魁天下仕至集賢院學士歙州刺史歿後三年邠人許衷集其遺文僅百篇目曰文標日久序存集亡文粹僅海潮賦漢隄詩新興寺碑銘上王僕射書四篇而已紹興庚辰建安邵公來守是邦謂宗說蒐綴闕文子職也俾求子發遺書得古律詩二十六首合賦序圖狀四十有二篇分爲三卷外錄一卷乃同邵李原岡編正皆述肇之行誼事蹟因墓在江西分宜縣文標鄉故名其集云

會昌進士詩一卷

明宏治刊本

劉蓉峯藏書

太學博士馬戴虞臣

宋陳振孫書錄解題著錄其集云與丹徒尉項斯渭南尉趙嘏皆會昌四五年進士琴川席啟寓刻唐百家詩卽此本也有彭城伯子空翠閣藏書二印

薛許昌詩集十卷

精寫本

許昌軍節度使檢校禮部尙書薛能太拙

能汾州人會昌六年登第補墊屋尉歷御史都官刑部員外郎攝嘉州刺史同州刺史京兆大尹出帥感化入授工部尙書復節度徐州徙鎮忠武廣明元年被殺有集十卷宋咸平癸卯刻於三川凡四百四十八篇樞密直學士尙書刑部侍郎知益州張詠序此本凡二百三十篇紹興元年山陰陸榮望選錄也有後跋毛氏汲古閣曾刻之此則鈔本耳

姚鵠詩集一卷

明翻宋本

罪木夫中溶古泉山館題跋云中版每葉廿行行十八字版心題姚鵠二字卷首題唐姚鵠詩集尾行題姚鵠詩終前無序目錄俱與杜曹等集同書中玄微等字尙缺末筆知亦以宋刊重翻者詩凡三十三首中多墨釘又有注一作某云云則前各本所無也首行下注字居雲會昌進士第有前人朱書改其下云蜀人受知李相德裕登會昌三年進士并以朱筆校唐音統籤注於字之旁填墨釘之字又添野寺寓居詩四首於末

劉滄詩一卷

明刊本

余秋室藏書

直齋書錄解題劉滄集一卷唐進士劉滄蘊靈撰昭德郡齋讀書志亦一卷云滄字蘊靈大中八年進士詩頗清麗句法絕類趙嘏此亦明正德間刊於唐人小集中者滄爲魯國人有余集印集字畧裳號秋室仁和人乾隆丙戌進士候選知縣 特徵

纂修 四庫全書官至侍讀學士道光壬午重宴鹿鳴有憶漫

庵牋稿

張喬詩集四卷 明仿宋刊本 劉蓉峯藏書

直齋書錄解題云張喬集二卷唐進士九華張喬撰與許棠張
蠙鄭谷喻坦之同時號十哲喬試京兆月中桂詩擅場於時而
登科記無名蓋不中第也此作四卷常熟席氏所刊宋本與此
無毫髮差

孫可之文集十卷 明正德刊本

唐孫樵撰樵字可之又字隱之關東人大中九年進士授中書
舍人遷職方郎中上柱國賜緋魚袋此集前有中和四年自序
稱文三十五篇編成十卷黃氏士禮居藏書題跋云可之文全
得力於退之觀其復佛寺奏仿佛諫迎佛骨表學有淵源卽此
可見其大矣第二第三兩卷宋刊本與毛刻本互易後得震澤

王守溪刻者行款字行與宋本十有八九之合始信正德本亦從宋刻出也此本前爲正德丁丑震澤王鏊序稱獲內閣祕本手錄以歸戶部主事白水王君直夫請刻以傳後有白水王諤跋

唐孫樵集十卷

明刊本

朱竹垞藏書

前有樵自序次天啓乙丑吳馥字祖堂序謂參攷文苑等籍釐正相沿之謬有竹垞印長水胡氏敦仁堂圖籍印

孫可之文集十卷

舊鈔本

右鈔本前有中和四年朝散大夫尙書職方郎中上柱國賜緋魚袋孫樵自序云樵家本關東代襲簪纓幼而工文得之真訣大中九年叨登上第廣明元年狂寇犯闕駕避岐隴詔赴行在遷職方郎中詔樵有揚馬之文樵遂閱所著文及碑碣書檄傳記銘誌得二百餘篇彙其可觀者三十五篇編成十卷以貽子

孫此書宋刻之外有王文恪吳下本林茂之問本毛子晉虞山
本又有天啓乙丑吳龍重訂本其書出將軍邊事云南蠻果
大入成都門其三門四日而旋而正德本脫去其三門四日而
旋七字翻云大入成都是一句門其三門是一句文粹創其三
門三字不成語文苑可證此鈔本不誤似較正德本爲勝惟顧
千里校宋槧本云龍多山錄云樵起辛而遊泊甲而休乃用書
辛壬癸甲也刻武侯碑陰云獨謂武侯治於燕爽乃用管夷吾
治於高傒也此鈔本仍作起來泊車與武侯之治比於燕爽洵
乎宋槧之可貴矣有芸閣祕笈門前穉極十頃田清溪繞屋花
連天兩印

盧仝詩集三卷外集一卷

明鈔宋本

仝號玉川子洛陽人累舉不第韓愈爲河南尹愛其詩厚禮之
後因宿王涯第中遂預甘露之禍讀書志稱集一卷直齋書錄

稱三卷集外詩十餘首慶歷八年韓盈謙甫爲之序末有亡名氏題云玉川子詩主於奇怪而語句渾成與唐之諸家不類其茶歌月蝕二篇尤爲世所傳誦昔之評詩者謂天地間不可無此則玉川詩之可愛者正以其怪耳予家藏宋刻本最爲完善因書之梓與騷壇之好奇者共鈔寫絕精

祠部詩集二卷

明刊宋本

祠部郎中曹鄴

鄴字業之桂林人累舉不第爲四怨三愁五情詩雅道甚古特爲舍人韋慤所知薦於禮部侍郎裴休大中四年進士有杏園宴間呈同年云歧路不在天十年行不至一旦公道開青雲在平地又云忽忽出九衢童僕顏色異故衣未及換尙有去年淚又云永持共濟心莫起胡越意志苦語佳仕至洋州刺史唐志載集三卷今僅二卷然較直齋書錄多一卷是刻非一本也

喻鳧詩集一卷

明翻宋本

瞿木夫中溶古泉山館題跋云中版每葉廿行行十八字版口題喻鳧二字卷首題喻鳧詩集尾行題喻鳧詩集終餘皆與杜曹等詩同前無序目詩凡三十三首內七絕一首五言六韻一首餘皆五律中有注一作某甚詳核宋諱雖無缺筆字與前各本相似恐亦以宋本重刊攷全唐詩錄載其近體詩二首卽在集中一爲七言絕句題作憶友人與此不合云鳧爲詩嘗以其業謁杜紫微不遇曰吾詩無羅綺鉛粉宜其不售也後登開成五年進士第終烏程令又書錄解題載喻鳧集一卷云唐烏程尉喻鳧撰開成五年進士

唐李推官披沙集六卷

明正德刊本

劉蓉峰藏書

隴西李咸用

前有紹熙四年十一月既望楊萬里序曰李兼孟達於金陵出

唐人詩一編乃其八世祖推官公披沙集也如見後卻無語別來長獨愁危城三面水古樹一邊春月明千嶠雪灘急五更風煙殘方有微雪甚卻無聲春雨有五色灑來花旋成雲藏山色晴還媚風約溪聲靜又回未醉已知醒後憶欲開先爲落時愁讀之使人發融冶之歡於荒寒無聊之中動慘戚之感於笑談方憐之初國風之遺音江左之異曲其果絃絕而可不煎膠歟槧印甚精有空翠閣藏書朱文圖記

唐李推官披沙集六卷

明刊本 汪魚亭藏書

隴西李咸用

直齋書錄云咸用八世孫兼孟達居宛陵亦能詩嘗官台州出其家集求楊誠齋作序正與此合有約菴居士汪魚亭藏閱書兩印

麟角集一卷附錄省題詩一卷

傳鈔本

汪魚亭藏書

唐水部郎中福清王榮輔之著

前有唐鄉貢進士黃璞撰傳云榮福唐人咸通三年進士及第
試倒載干戈賦天驥呈才詩公詞賦清婉託意奇巧有江南春
賦末云今日併爲天下春無江南兮江北廉使杜公宣猷請署
團練巡官將有瑤席之選公辭以舊與陳郎中輩有要約就陳
氏婚好時以誠信奇之後除太常博士入省爲水部郎中不幸
黃巢竊據京闕公既遇亂不知所之或云歸於鄉里次有公小
像凡律賦二十五首附省題詩二十一首爲宋紹興乙卯八代
孫蘋任著作佐郎於館閣讐校時所錄歛鮑廷博刻於知不足
齋福鼎王氏刻於麟後山房陳壽祺有跋補文苑英華五十九
卷中沛父老畱漢高祖賦又附錄文粹九十八卷陳黯送王榮
序此爲舊鈔行欵疏朗有汪魚亭藏閱書一印

唐皮日休文藪十卷

明刊本

汪季青藏書

唐皮日休襲美著

日休襄陽人居鹿門山自號醉吟先生咸通八年進士官太常博士是書前有宋柳開序及自序云咸通丙戌射策不第退歸州來別墅編次其文復將貢於有司發篋叢萃繁如藪澤因名其書曰文藪凡二百篇爲十卷萬厯戊申吳門許自昌於袁氏獲宋版文藪刻之家塾并爲小引有古香樓休甯汪季青家藏書籍摘藻堂藏書諸印

唐皮從事倡酬詩八卷

明刊本

唐皮日休襲美著明許自昌立祐校

皮襲美與陸魯望倡酬之詩爲松陵集十卷明許自昌既刻皮子文藪復專刻襲美唱酬之作本總集而又爲別集也諫議大夫崔璞出爲蘇州刺史辟日休爲從事故題其官

唐甫里先生文集二十卷

明鈔本

許丹臣舊藏

笠澤陸龜蒙字魯望

魯望蘇州人居松江甫里因稱甫里先生著有吳興實錄四十卷松陵集十卷笠澤叢書八十餘篇乾符六年自爲叢書序宋元符三年刻於蜀爲七卷樊開序政和元年刻於平江毗陵朱衮序二序均題笠澤叢書也寶祐五年吳江葉茵景文始以松陵笠澤叢書歸併總爲二十卷計詩文六百五十二篇茵爲序明年林希逸序故晁氏陳氏皆無甫里集之名明成化丁未崑山嚴景和重刊於附錄中增胡宿撰甫里先生碑銘陸鈇爲序萬厯中松江許自昌重刻嚴本附錄又增范成大吳郡志王鏊姑蘇志各一條茲鈔本每葉十六行行十六字有康熙壬辰許心展丹臣手校記云無異先中翰癸卯刊本又云癸亥冬山左歸里得之樓居二十年來半爲南北驅馳半爲家庭風波何暇論詩高閣置之今夏書賈云全集坊間無版欲易去余辭之云

留稿商刻無副本也心展爲自昌孫又爲葉九來壻宜其藏書
具有淵源黃蕘圃手補附錄及跋語三則有高陽丹山藏書許
心展印蕘翁手校諸印

胡曾詠史詩一卷

精寫本

唐邵陽胡曾著曾舉咸通進士不第爲漢南從事有安定集久
不傳此詩舉地爲題自不周山至汴水凡七言絕句一百五十
二首各有注語

雲臺編三卷

影明嘉靖刊本

都官郎中鄭谷

谷字守愚宜春人光啟三年進士仕至都官郎中新唐書藝文
志載有雲臺編宜陽集各三卷今獨存此編自序云乾甯初上
幸三峰朝謁多暇寓止雲臺道舍因以所記編成三百首末附
拾遺當爲後人所補明嘉靖乙未袁郡嚴嵩序稱州南仰山有

都官書堂遺址尋之不可復識此集得之吳中故少傅王文恪公公錄自祕閣假歸正其譌缺刻之

司空表聖文集十卷

鈔本

河中司空圖表聖

圖河中人咸通十年進士昭宗在華州召爲兵部侍郎以足疾乞還中條山王官谷築三休亭號知非子耐辱居士聞哀帝遇弑不食嘔血卒年七十有二右集大題在下爲一鳴集前有光啟三年泗水司空氏自序陳氏書錄解題一鳴集十卷蜀本前後八卷俱題雜著惟五六兩卷題作碑今按卷七雜著中有復安南碑不應此二卷獨題碑當由後人誤改殆卽陳氏所見之本歟

曹松詩集一卷

明翻宋本

劉蕡家藏書

瞿木夫中浴古泉山館題跋云中版每葉廿行行十八字版心

中題曹松二字卷首題曹松詩集餘並與杜育各集同前無序
目不分體中多五律如玄匡樹等字仍同宋刻缺筆詩不分體
凡一百首中有墨釘及一作某云云攷諸書志云曹松集一卷
唐曹松夢徵作也舒州人學賈島爲詩天復元年與王希羽劉
象柯崇鄭希顏同登第年皆七十餘號五老榜時以新平內難
聞放進士喜特敕授校書郎而卒又書錄解題云別本與印本
互有詳略但別本大遊仙十三首乃曹唐詩也此本卷首下有
前人朱書注云字夢徵舒州人學賈島爲詩久困名場昭宗天
復初與王希禹等五人同登第時號五老榜授省書正字又批
其上方云王希禹年七十三陳光問年六十九松年五十五劉
象年七十柯崇年六十四鄭希顏年五十九據言云松於詩外
無他能時號其啟事爲送年腳狀又以唐音戊籤校改於旁并
据以鈔自立春以下三十七首補於後其滕王閣春日晚望五

律一首書中空缺下半首据戊籤補足下注趙凡夫載前半補
萬首絕句誤卷首有白文長圖書云淮南蔡翰臣印書中朱字
未知卽其人手筆否

周賀詩一卷 依宋寫本

葉林宗跋云周賀東雒人少從浮圖法卽清塞也遇姚合而遂
易名藝文志云詩一卷然未見傳本顧茂倫唐詩英華選賀詩
七首有贈厲玄侍御一首此集又不載未知茂倫從何處錄也
此本亦藏茂倫家末有臨安府棚北睦親坊南陳宅書籍鋪印
細字一行確是宋版余遂借歸手鈔於松風書屋今以唐百家
內周賀詩核之卽是此本益知百家詩從棚本出也

韓翰林集一卷香奩集一卷

舊鈔本

璞川吳氏振綺汪氏藏書

唐翰林承旨行戶部侍郎知制誥上柱國韓偓致堯著

偓京兆人自號玉山樵人龍紀元年擢第天復中爲翰林學士

遷中書舍人從昭宗幸鳳翔進兵部侍郎翰林承旨以朱全忠
構禍貶濮州司馬天祐二年復召爲學士不敢入朝依王審知
卒席刻宋本與此本不同罍里瞿氏書日記云香齋集有無題
詩四首浣紗溪詞二首清蜀葵紅芭蕉兩賦係宋刊本影寫不
名內翰別集亦不注入內庭後詩五字與此正相符合附沈存
中筆談一則辨和凝僞詞假託之非有瑣川吳氏收藏圖書汪
魚亭藏閱書兩印

唐祕書省正字先輩徐公鉞文集十卷

舊鈔本

馬笏齋藏書

唐徐寅昭夢著

文瀾閣有徐正字詩賦二卷此爲元延祐中裔孫玩可珍所輯
十卷本序云公登唐乾甯進士第試止戈爲武賦魁天下授祕
書省正字先輩時人推尊之稱釣磯乃歸隱適意處號也舊譜
載十二代著作佐郎賜紫魚袋師仁序又徐玩序云公文集有

賦五卷探龍集五卷又於蔡君謨家得雅道機要一卷詩二百五十餘首既有有序必有集今皆亡失至延祐丁酉叔父司訓公得詩二百六十餘首復於己亥歲族叔祖道真公遺賦四十篇合而寶之卽此本也舊缺第五卷此獨全惟威武軍殿中侍御史劉山甫所撰墓志銘未附於後全唐文尙有均田賦文苑英華尙有籍田賦衡賦可待補遺也寅或作寅莆田人唐才子傳作大順三年蔣詠榜下進士及第有馬玉堂印笏齋藏本兩印羅昭諫集十四卷補遺一卷

舊鈔本

餘杭羅隱昭諫

隱字昭諫一稱錢塘人乾符初舉進士累不第廣明中遇亂歸鄉時錢尙父鎮東南隱依之爲掌書記表遷節度判官鹽鐵發運使轉司勳郎中所著有兩同書江東甲乙集淮海寓言及講書陳振孫書錄解題甲乙集十卷後集五卷湘南集三卷且注

藏書志卷二十五

三

云甲乙集皆詩後集有律賦數首湘南集乃長沙幕中應用之
文康熙初知新城縣張瓚刻作八卷 四庫著錄者是也此舊
鈔本題餘杭羅隱昭諫與宋刻甲乙集合前十卷皆詩卽出自
宋本其中字句頗有勝於汲古閣刻者第十一卷乃文疏序書
論碑銘狀紀事第十二卷啟第十三卷雜著第十四卷兩同書
當卽後集與湘南集之文耳前有至元年新城令某集引又康
熙壬寅何義門題識一則鈐有新習主人之印

浣花集十卷

明刊本

前有韋藹序云余兄莊自庚子亂離前著歌詩文章兵火迭興
簡編俱墜辛酉春爲西蜀奏記明年浣花溪尋得杜工部舊址
雖蕪沒而杜砥猶存因結茅一室蓋欲思其人而成其處非敢
廣其基構耳藹因間日錄兄之稿草目曰浣花集亦杜陵所居
之義也莊字端已乾甯九年第進士授校書郎後仕蜀王建至

吏部侍郎同平章事文獻通攷載莊集五卷此乃毛子晉綠君亭所刻十卷本有片石山房一印

廣成集十七卷

舊鈔本

上都太清宮內供奉應制文章大德賜紫杜光庭撰

光庭字賓聖長安人僖宗時應九經舉不第嘗從道士潘尊師遊會僖宗求可領蜀中道教者潘薦光庭遂奉詔披戴賜號廣成先生按朱子通鑑綱目書王建以道士杜光庭爲諫議大夫今集中又有謝戶部侍郎表先則由儒入道繼則由道而仕宋藝文志廣成集一百卷豈合道教靈驗記十五卷神仙感遇傳五卷墉城集仙錄六卷洞天福地嶽瀆名山記一卷而言耶通志藝文略集作三十卷四庫收十二卷此鈔本十七卷殆出自道藏者前三卷表文後皆齋醮之詞文頗瞻麗雖多神怪之說亦彼教中自有之典要也

唐女郎魚元機詩一卷

影宋本 汪國原藏書

元機長安人性聰慧好讀書尤工韻調情致繁縟咸通間爲補闕李億侍寵億因夫人不能容遣隸咸宜觀披戴集中贈鄰女易求無價寶難得有心郎詩卽怨李也有登崇真觀南樓觀新進士題名榜詩自恨羅衣掩詩句舉頭空羨榜中名其意使爲男子必有用之才故詞旨激切卷後有臨安府棚北睦親坊南陳宅書籍鋪印一條黃蕘圖得而取宋刊洪邁唐人絕句韋穀才調集校其異同又與薛濤詩楊太子宫詞合刻之卷端有汪士鐘印閬源甫三十五峰園主人所藏三印蓋卽影寫棚本並繪元機小影於末余按嘉靖間唐詩百家有此一種對看不差毫髮後題云元機善吟詠美風調雖未免涉於多情而幽柔融雅有足悲焉婦人之集其僅存者豈多見邪予愍其無傳也今刻之惜蕘翁未之見耳

桂苑筆耕二十卷 高麗活字本

都統巡官侍御史內供奉崔致遠撰

致遠字海夫號孤雲年十二入中國又六年取進士調溧水尉從事高駢軍幕有討黃巢檄天下傳誦奏除殿中侍御史充國信使東歸仍仕本國爲翰林學士兵部侍郎武成太守中和間進所著雜詩賦及表奏集二十八卷於朝唐宋志皆著錄宋後遂逸今惟傳高麗活字印桂苑筆耕集二十卷前有洪秩周徐有渠二序及致遠進奏狀奏有云適當亂離寓食戎幕餽粥於是輒以筆耕爲目其私試今體賦一卷五言七言今體詩一卷雜詩賦一卷中山覆篋集五卷皆不傳此集在彼國亦推人文鼻祖久所珍祕也

右別集類三

善本書室藏書志卷二十五終

善本書室藏書志卷二十六

錢塘丁丙松生甫輯

集部五

徐公文集三十卷

依宋鈔本

王晚間舊藏

東海徐鉉

鉉字鼎臣廣陵人楊溥時爲祕書郎直宣徽北院掌文翰李昇時知制誥璟煜時遷翰林學士歸宋爲直學士院給事中散騎常侍故一名騎省集晁陳兩家並稱集三十卷陳氏謂前二十卷仕江南所作餘十卷歸朝後作所撰國主李煜墓銘婉微有體集爲其子堦尙書水部員外郎吳淑編天禧元年行尙書都官員外郎胡克順假故參知政事陳彭年所序本鏤版表進仍列淳化四年祕書郎陳彭年序後列徐公行狀李昉撰徐公墓誌銘李至楊徽之祭文李至輓歌詞紹興十九年徐琛撰明州

重刊徐騎省文集後序末有迂齋金侃識云騎省集近世鮮有刻者此本虞山錢氏於崇禎間從史館印摹南宋本字頗大予縮小鈔之集中今上御名者高宗構也太祖諱匡胤太祖父仁祖諱殷弘真宗諱禎英宗諱曙故字皆缺一筆太宗諱炁神宗諱頊欽宗諱桓如敬鏡竟貞徵勗署完諸字亦缺一筆今悉仍之右乃吳興陶氏鈔本格版心刊篤素好齋藏書六字有十萬卷樓晚間居士兩印

徐騎省文集三十卷 經鋐堂鈔本

東海徐鉉

右爲湖州經鋐堂倪氏綠格精鈔本書法整齊殊可愛玩前錄祕書郎陳彭年序太常丞集賢校理晏殊序知明州軍州事徐琛跋天禧元年三司戶部判官臣胡克順進文集表批答曰敕胡克順省所上表進新印徐鉉文集兩部計六十卷共一十二

冊事具悉徐鉉生於江介早著時名歷事祖宗之朝嘗居文翰之任發揮詰命有溫雅之風備預諮詢見該通之學矧唯素履无謝古人汝克慕前修盡編遺札俾之摹印庶幾流傳覩奏御之爰來諒恪勤之所至覽觀之際嘉歎良深故茲獎諭想宜知悉又附行狀李昉撰墓誌銘楊徽之張洎等祭文挽詞

徐公文集三十卷

知不足齋鈔本

東海徐鉉

右依宋本繕錄行款避諱悉同前帙間有鮑廷博校字

河東柳仲塗先生文集十五卷附行狀一卷

舊鈔本藏書

呂氏講習堂

宋柳開撰開字仲塗大名人開寶六年進士歷知常潤州以殿中侍御史換崇議使又歷入郤咸平四年終於京師門人張景爲行狀集序歐公嘗推本朝古文自仲塗始此鈔本脫景序有禦兒呂氏講習堂經籍圖書及呂甫中印无咎小印猶是前明

舊帙又有好學爲福齋藏古潭州袁卧雪廬收藏兩印則後來所鈐者

河東先生集十六卷

精鈔本 怡府藏書

門人張景編

宋知滄州柳開仲塗撰方五季之餘文體荏弱開獨能以韓柳爲宗故其初名肩愈字紹元旣而易之自謂能開聖道之塗廬陵嘗推本朝古文斷自開始而尹洙穆修繼之特此論文章氣運之先後耳然亦難乎其爲創矣默書諸篇沈雄堅潔實有本源陳氏日以艱澀過矣至論揚雄劇秦美新之論謂此新於秦同其惡也劇者惡之甚也美者謂新之惡少異於秦也夫秦滅六國豈與莽竊科同而尙分其優劣哉駁班史論雄言不當稱經謂明聖人之道卽稱聖人之言似也至謂聖人之道存乎揚其可乎昌黎集序謂韓之文得聖人大道似也至謂遠過於孟

子其可乎此本藍格精鈔有丹筆校字鈴安樂堂藏書記明善堂珍藏書畫印諸記

咸平集三十卷

舊鈔本

京兆田錫著

錫字表聖蜀國人題京兆耆溯其先也太平興國三年進士歷守相臺桐廬淮陽海陵四郡知制誥終於諫議大夫宋藝文志載奏議二卷文獻通攷載咸平集五十卷此合奏議與詩文僅編爲三十卷已非舊帙矣前有范仲淹田司徒墓誌銘司馬光田司徒神道碑陰蘇軾田表聖奏議序後附太平五年十月十日嗣子朝請大夫尙書吏部郎中兼侍御史知雜事上柱國京兆縣開國男食邑三百戶賜紫金魚袋錫謨述先君贈工部郎中墓碣

忠愍公詩集三卷

明宏治刊本

開府儀同三司太子太傅中書令上柱國萊國公寇準

前後載萊國寇忠愍公旌忠之碑參知政事孫朴奉敕撰新開寇公詩集序宣和五年濟南王次翁撰忠愍公詩序金紫光祿大夫行尚書戶部侍郎知河陽軍州事上柱國范雍述贈諡誥丁理行再開萊公詩集後序隆興改元七月長樂辛敷書此本爲宏治庚申四月平川王承裕所刊并引云忠愍寇公之相眞宗也虜犯澶淵勸上親征不動聲色而措天下於泰山之安竟以譏譖謫居遐荒齋志以沒人皆寃之尋詔歸葬洛師又詔復官爵又詔節惠易名又詔史臣述功行以垂後世卒於公無所損而公之名愈彰矣承裕年甫三十餘讀公之詩知其有劉長卿元微之之風格於是錄而藏之

忠愍公詩三卷

精鈔校宋本

開府儀同三司太子太傅中書令上柱國公寇準著

初準知巴東縣時自編詩百餘篇爲巴東集後知河陽軍州事
范雍請於公家盡錄昔所存紀及謫官後趙公臨所記共二百
四十首類而第分爲上中下三卷惟久磨滅因序以成編隆興
改元長樂辛敬再序云太原范伯純錄公篇什分爲三卷春陵
得之尤其後也蓋公晚年選謫嘗至春陵邦人思慕不忘建樓
畫像以崇朝夕然詩篇之傳家百不一焉宣和間王公次翁來
茲景仰前修取舊集刊版以傳近時楊守惇亦卽舊版重加刊
治未幾字之漫滅復且過半敬適茲承乏恐寢以失真復校正
一新焉蓋范王楊辛已四刊矣此本寫極工細復丹筆校誤閱
之心齋有靜質堂圖書

乖崖先生文集十二卷附錄一卷

淡生堂鈔本

宋張詠撰詠字復之濮州人太平興國中進士累遷至樞密直
學士御史中丞禮部尙書追謚忠定自號乖崖子嘗寫真自贊

曰乖則違眾崖不利物乖崖之名聊以表德公之救餘杭也時
值歲歉人多以私鹽犯禁公皆異斷之不過二十罰於是警邏
莫戢巡檢入敢白將何爲禁公怡然行酒謂之曰錢塘十萬人
飢者將八九苟不以私鹽自活或一旦聚數千輩盡其死命擾
其不飢者爾等將奈何吾俟其秋成則約之以法是歲杭人無
一夫爲盜卽此可感其德矣前有宣教郎前知鄂州崇陽縣主
管勸農營田公事天台郭森卿題辭曰故禮部尙書忠定張公
以直道事太宗眞宗雖不登相位而眷倚特隆天下誦其事業
而鮮有知其文者今觀其文磊磊落落實大以肆其光明碩大
之學尊主庇民之道得於天韻之自然殆非語言文字之學所
能到也崇陽舊尹陳侯模欲刊公遺文未果屬使成之舊本得
之通城楊君津家凡十卷今爲十二卷會粹訂正屬之尉曹孫
君惟寅而使學生存中參焉外有韓魏公所作神道碑內翰王

公送公宰崇陽序李巽巖撰祠堂記項平庵北峰亭記此其文
皆知公之深者爰並錄之卷端有山陰祁氏藏書之章澹生堂
藏書記臚翁于識子孫世珍諸印

乖崖先生文集十二卷附錄一卷

鳴野山房鈔本

此書趙希弁讀書附志載集十卷陳振孫書錄解題作十二卷
此與陳氏書錄卷數合前有天台郭森鄉序附錄韓琦神道碑
銘及序廟記等篇

王黃州小畜集三十卷

經鉅堂依宋鈔本

右宋王禹偁撰禹偁字元之鉅野人太平興國八年登進士第
端拱初擢左司諫知制誥判大理寺辨徐鉉罪貶商州團練副
使復召還知制誥入爲翰林學士以孝章皇后梓宮遷至主第
稱當用舊典左遷知滁州眞宗復召修太宗實錄坐語涉輕訕
出守黃州徙蘄州嘗自次其文箴易得乾之小畜集之名以此

也凡賦二卷詩十一卷文十七卷與晁陳二志卷數相符前載
紹興丁卯之明年歷陽沈虞卿序稱內翰王公以文章道義被
遇太宗咸謂咫尺黃閣矣偶左遷來齊安邦人沐浴恩惠爲繪
像立祠東城居士親拜其下歷歲滋久經涉兵盜無一存者平
生撰著極富有手編文集三十卷其文簡易醇質得之者珍祕
不傳故人多未見虞卿假守於此因以所藏小畜集點勘鏤版
與四方學者共之末有契勘公文稱小畜集計一十六萬三千
八百四十八字四百五十二版合用紙墨工價數目並校正監
雕七街名此爲經鉅堂校錄者

王黃州小畜外集殘本七卷 影寫宋本

右卷第七至卷十三止前後尙有缺葉按陳振孫書錄解題元
之文自爲之序曰閱平生所爲文類而第之得三十卷將名其
集以易筮之遇乾之小畜象曰君子以懿文德未能行其施但

可誌文而已外集者其曾孫汾哀輯遺文得三百四十首又有
承明集十卷奏議集三卷注曰未見外集亦不著卷數此七至
十三斷非承明之十卷也有太原叔子藏書記歛鮑氏知不足
齋藏兩朱印

楊大年先生武彝新集二十卷

舊鈔本

王鴻緒藏書

翰林學士朝散大夫行左司諫知制誥同修國史判史館上柱
國號略縣開國子食邑六百戶賜紫金魚袋楊億自序曰咸平
戊戌知括蒼郡再更年籥復朝京師入西臺掌誥命景德丙午
仲冬被召入翰林因取十年來詩筆條次爲二十編目曰武夷
新集蓋山林之士不忘維桑之情雕篆之文竊懷敝帚之愛命
題之意良在是也此本自序前又有官滿疆者失其名一片文
極工俟攷前題刊關李繡文素鍾秀李葆貞守一武林龔五鼓
華茂同較三行鈐有王鴻緒印洵舊物也按億建州人年十一

召試詩賦授祕書正字淳化中賜進士第直集賢院眞宗朝知制誥入爲翰林學士祥符中母病不待報歸省自以疾丐解官疾愈復爲學士卒贈禮部尙書諡曰文鎮國節度使李勗乞加諡忠奏雖不行詔付史館據本傳著有括蒼武夷潁陰韓城退居汝陽蓬山冠麓等集及內外制筆刀共一百九十四卷館閣書目猶有一百四十六卷今傳者惟此新集二十卷而已其別集十二卷乃歸陽翟時作葉氏菴竹堂書目尙有之今亦亡矣鴻緒字季友康熙癸丑第二人及第官至工部尙書有橫雲山人詩稿

林和靖先生詩集四卷 鮑澤飲校正統本

宋林逋撰宋史本傳逋字君復錢塘人少孤力學弗趨榮利初放游江湖間久之歸杭州結廬孤山二十年不入城市眞宗詔賜粟帛嘗自爲墓於廬臨終詩有茂陵他日求遺稿猶寓曾無

封禪書之句既卒上聞仁宗賜謚和靖先生詩多奇句既就稿隨棄之好事者往往竊記之今所傳三百餘篇皇祐五年太常博士梅堯臣因諸孫大言之請爲序其集次列先生遺像綴以宋安撫臨安府尹袁韶贊次宋史本傳次葉森墓堂記次林集詩話十五條第一卷五言古詩四首五言律詩八十二首第二卷七言律詩七十首第三卷七言律詩六十一首第四卷五言絕句五首七言絕句七十八首詩餘三首鮑以文卷端題云宋刻詩不分體曾於願抱冲家見之惜未借校今以正統八年陳贊刊本校按劉後村詩話逋一生苦吟自摘出五言十三聯今惟五聯見集中如隱非唐甲子病有層春秋水天雲黑白霜野樹青紅風回時帶溜烟遠忽藏村及郭索鉤輅之聯皆不在焉七言十七聯集逸其三使非有摘句圖旁證則皆成逸詩矣

宋林和靖先生詩集四卷附錄一卷

明正德刊本
鮑氏藏書

茗溪倪氏錄西

前有明正德丁丑閏十二月望太子太保刑部尚書總制川陝
湖河四省軍務致仕七十六翁錢塘兩峰洪鐘序云先生詩集
歲久殘缺無復可觀近者地官主政西蜀韓君廷延當塗喻君
子貞相繼督課來杭仰先哲於既往慨嘉言之弗彰屬沈君履
德輯訂并續名賢題跋及近時謁墓之辭萃爲一卷復得先生
遺像冠於卷端屬余贊且序焉仍列梅堯臣舊序附錄宋史傳
歸田錄青箱雜記西湖書院志及葉森夏時正墓記李祁巢居
閣記杭淮放鶴亭醉辭餘自宋范仲淹以次十五賢元陳孚以
次十八賢明張羽以次六十一賢詩篇有苕西經鉅堂倪氏收
藏真本歛西長塘鮑氏知不足齋藏書兩印按西湖書院志今
已不存中載元至正間江浙儒學提舉余謙修處士墓得張南
軒手書梅軒二字遂扁亭上又郡人陳子安以處士不娶無嗣
以鶴爲子既有梅不可無鶴乃持一鶴爲孤山之榮構軒以名

之錄此以存院志之一

重編西湖林和靖先生詩集四卷

影明正統八年刊本

姚江陳貺編次錢塘王玘校正銀梓

此影寫正統時餘姚陳貺編本前序已脫後附東坡先生書林
逋詩後姑蘇老農黃庭堅秦觀紹興壬子龜詵沈說諸賢題跋
及葉景修記和靖祠堂本末

和靖先生詩集二卷

影宋本

右每葉十八行每行二十字卷首題和靖先生詩集序次行低
七格題太常博士宛陵梅堯臣撰凡天下朝廷俱提行集之首
行題和靖先生詩集上次行低二格題古詩三行低四格題和
運使陳學士遊靈隱寺寓懷其下卷律詩低二格詩題低四格
版心題和靖先生詩上下有刻工姓名愚按即仁寶七修類稿
云世重宋版詩文以其字不差謬今刻不特差謬且多遺落予

因林和靖詩而歎之舊名止曰漫稿上下兩卷今分爲四卷舊題如送范寺丞仲淹今改爲送范仲淹寺丞者最多今拾遺和運使陳學士遊靈隱寺古詩四章宋刻首篇者也今僅律絕而遂以此爲拾遺可乎耶說與此皆合姑附證之

河南穆公集三卷遺事一卷

精鈔本

十萬卷樓藏書

穆修伯長

此本穆劉清之跋於前亳州法相禪院鐘記疑疑崇構構字注御名知從宋紹興雕本出也其間某字一作某極不苟間有丹黃校謄卷端雖無印識然得自蕭山王氏知其爲十萬卷樓故物

穆參軍集三卷附遺事一卷

舊鈔本

河南穆修伯長著范陽祖無擇擇之編

朱彝尊識云穆參軍集世間行本無祖無擇序余於康熙戊子

購得洛陽九老祖龍學文集見有是序揀出冠之編首遂稱全
壁序稱明道元年秋修終於家求遺文於嗣子熙得詩五十六
書記誌祭文總二十姑頻次爲三卷題曰河南穆公集慶歷三
年春南康清修閣序後有遺事一卷

晏元獻遺文一卷

舊鈔本

右慈谿胡亦堂二齋選輯元獻遺詩與文僅各六篇餘則詞三
十餘闕自爲序之按晏殊字同叔臨川人景德三年賜同進士
出身累擢知制誥翰林學士寶元三年拜平章事東都事略稱
文集二百四十卷中興書目載九十四卷馬氏攷晁氏志均載
臨川集三十卷紫微集一卷今皆有目無書矣

元獻遺文一卷

仁和勞李言增輯本

宋晏殊撰殊事迹具宋史本傳東都事略中興書目文獻通攷
書錄解題所載今皆不傳 四庫著錄胡亦堂輯本僅文六篇

詩六首餘皆詩餘此仁和勞季言採玉海事文類聚播芳大全
宋文鑑茅山志歲時雜詠侯鯖錄西清詩話老學菴筆記瀛奎
律髓汝州志青箱雜記海棠譜鐵網珊瑚會稽掇英集及諸文
集序凡增文二十二篇詩一百三十餘首及單辭斷文又十餘
件文則倍於原輯詩則視原輯幾二十餘倍可謂美且富矣有
季言汲古勞辛檢印梁甫諸印

文莊集三十六卷

精鈔本

宋夏竦撰

竦字子喬江州德安人景德三年舉賢良方正官至武甯軍節
度使謚文莊宋史有傳著有古文四聲韻五卷今尙傳竦集凡
一百卷並見於宋藝文志晁陳兩目亡佚已久 四庫館臣輯
白永樂大典兼以他書附益之爲三十六卷載宋敏求江總原
序殆不以人廢言也

春卿遺稿一卷

舊鈔本

宋禮部侍郎蔣堂著

堂字希魯宜興人大中祥符五年進士官諫議大夫知蘇州改給事中仍知州事以禮部侍郎致仕宋史有傳堂致仕後寓吳中雖飲食寢處未忘吟詠有吳門集二十卷晁氏陳氏皆不著錄散佚已久明天啟中二十世孫鎮掇拾成此以堂舊官題曰春卿并跋其後然宋史本傳中論郭皇后不當廢疏論禁中火起疏言不必別置發運使疏奏復鑑湖馬湖疏會稽掇英集成都文類嘉泰會稽志所刊諸作尙未採入可見遺漏尙多也

鉅鹿東觀集十卷

舊鈔補本

俞泰峰藏書

宋魏野仲先

野字仲宣居陝之東郊爲詩精絕有唐人風格眞宗祀汾陰以禮聘之不起有草堂集十卷祥符中契丹使至言本國喜誦魏

野詩但得半帙願求全部眞宗始知其名將召之死已數年搜其詩果得草堂集詔賜之野之子閒字雲夫綽有父風出遺著乞樞密直學士薛田序之時在天聖元年題曰東觀者以野追贈祕書省著作郎以誌榮遇也是集前有薛田序謂令息閒出其先君所著新舊詩四百篇除零落外以其國風教化諷刺歌頌比興緣情者混而編之彙爲七卷求爲序述欲使乎先君之道之行彬蔚而不泯云而第四第五第六三卷乃屬補鈔其原鈔第四以朱筆改爲七字下則遞次而改仍足十卷始悟四庫總目云據薛田序野先有草堂集行在人間宋史亦稱野草堂集十卷則十卷者野舊本也序又稱其子閒以新舊詩三百篇混而編之彙爲七卷則東觀集者閒所重編七卷之本也此本凡詩三百五十九首題曰東觀集而乃作十卷未論其故豈序文誤十爲七歟別有東觀集補遺三卷出杭州汪氏家前後

無序跋不知何人所輯今核所載詩一百十九首卽此本之四卷至六卷蓋書賈作偽之本不足爲據云云然則此本正合總目所言歟存以備攷證有泰峰小印當爲上海郁氏所藏

鉅鹿東觀集十卷

王氏十萬卷樓鈔本

宋處士東郊魏野仲先撰

首有天聖元年十二月樞密直學士知益州充兵馬鈐轄薛田序次宋史本傳集乃野之子開所編晁氏讀書記云野隱於陝之東郊手植竹木繞以流泉鑿土爲樂天洞前立草堂爲詩清苦句多警策與寇準王旦善往來酬唱祀汾陰歲召不起卒贈著作郎按漁洋文集云魏野詩數聲離岸櫓幾點別州山一篇最佳王彥輔記其一絕亦有風致可喜城裏爭看城外花獨來城裏訪僧家辛勤旋覓新鑽火爲我親烹嶽麓茶今集中失載

鉅鹿東觀集十卷補遺一卷

舊鈔本

趙氏星鳳閣校藏

宋處士東郊魏野仲先撰

右精寫本趙氏輯甯據宋本朱筆校正而附錄東都事略宋史本傳玉壺清話青箱雜記澠水燕談錄渭南文集諸條於後有古歡書屋趙輯甯印兩印

武溪集二十卷

明成化刊本

袁氏五硯樓藏書

工部尚書充集賢院學士贈尚書左僕射累贈少師諡襄公余靖靖字安道韶州曲江人天聖二年進士累除右正言知制誥出知古州經略廣西南路安撫使遷工部侍郎官至工部尚書宋史有傳是集爲其子屯田員外郎仲荀所編乞尚書屯田郎中周源爲序紹興丁巳穎川韓璜題書集後自宋迄明書幾湮失璜臺邱濟仲深得於祕閣手自錄之星奔歸里韶郡太守蘇韓同知方輿通判徐暉請留刻郡齋溶序於前韓書於後時在成都化九年並附歐陽修撰公神道碑銘於末嘉靖甲午都御史唐

皆有重刊本此則成化原鈔也有五硯樓袁氏收藏金石圖書
印五硯樓宛仲氏圖書

安陽集五十卷

明正德刊本

張佩兼藏書

宋忠獻魏王韓琦著安陽張士隆重刊

宋韓琦撰趙希弁附志云王安陽人故以名集王字稚圭天聖
五年進士第二人定策三朝功在國史神宗御製神道碑有云
薨前一夕有大星殞於國中櫪馬皆鳴又云公奉詔立皇子被
顧命立英宗爲皇帝可謂定策元勛之臣矣贈尚書令諡忠獻
追封魏王配享英宗廟庭集爲正德九年進士監察御史里人
張士隆所刊有山西按察司提學副使齊安曾大有爲序

范文公集二十卷別集四卷政府奏議二卷尺牘二卷年譜一卷年
譜補遺一卷言行拾遺事錄四卷鄱陽遺事錄一卷遺跡一卷義莊
規矩一卷褒賢集九卷

明翻元刊本

後學時兆文黃姬水李鳳翔校正十五世孫啟又十六世孫惟元同校

宋范仲淹撰仲淹字希文其先邠人大中祥符八年進士榜名朱說幼孤隨母適朱氏及爲兗州推官始復姓更名仕至樞密副使參知政事謚文正爲學明經術慕古人事業慨然有康濟之志作文章尤以傳道爲任姑蘇之范皆疏屬置義莊以明給之文集二十卷有元祐四年新知杭州軍州事蘇軾序序後木記曰天歷戊辰改元褒賢世家重刊於家塾歲寒堂別集四卷皆詩賦政府奏議舊有韓琦序目錄後木記曰元統甲戌褒賢世家歲寒堂刊尺牘向有五卷今所傳止二卷年譜一卷舊爲樓鑰編次五世孫之柔校正年譜補遺一卷有元天歷三年八世孫國儒跋言行遺事錄四卷文正公三卷監簿忠宣諸公一世孫國遺事錄一卷宋陳貽範爲序遺跡一卷附載中白山東

及洛陽西夏堡寨諸跡義莊規矩一卷褒賢集凡九卷褒賢集
一詞記二朝廷優崇一遺文一諸賢贊頌論疏一諸賢論頌一
諸賢詩頌一祭文一蓋自元槩之後以此刻爲佳耳

河南尹先生文集二十七卷附錄一卷

舊鈔本

王氏十萬卷樓藏

宋尹洙撰洙字師魯河南人天聖二年進士以薦爲館閣校勘
累遷右司諫知渭州兼鎮涇源路經略尋貶筠州監酒與穆伯
長同爲古文范文正爲作集序歐陽公亦稱其簡而有法葉石
林以師魯不長於詩亦自以爲無益而廢事故集中詩止一卷
宋宗室希弁續晁氏讀書志云志稱尹師魯集二十卷希弁所
藏二十七卷今此本與趙氏志合二十六七兩卷則五代春秋
而附錄一卷則本傳及韓忠獻所撰墓表諸文也久無刻本藏
書家多係鈔錄此爲王氏十萬卷樓寫藏有宗炎圖書

尹師魯河南集二十七卷附錄一卷

趙氏小山堂鈔本

前有高平范仲淹序卷一皇雅律詩卷二至十七雜議雜文記
序書啟行狀碑表碣述誌銘祭文卷十八表疏十九劄子二十
至二十二卷奏狀二十三卷奏議二十四五卷申狀二十六七
卷五代春秋附錄本傳墓表祭文墓誌論尹師魯墓志祭文乞
與尹構一官狀雜見事跡新城王尙書曾三跋其書嘉慶戊辰
胥臺陳氏始有雕本此則趙氏小山堂鈔本也

河南先生文集二十七卷附錄一卷

舊鈔本

徐孝先童僕庵藏書

案河南集馬氏文獻通考云二十卷陳氏書錄解題云二十二
卷別有書判二卷今考范文正序云二十七卷宋史藝文志亦
云二十七卷是今所流傳之本猶是當時舊第馬氏陳氏所云
或當日別刻之本故與今本不同耳此帙鈔本極舊凡北宋諱
皆缺筆構字注曰今上御名當從紹興槧本錄出字亦瘦勁古
雅首尾係一手所書卷首鈐有白文徐介之印及狷庵朱文二

方印當爲吾鄉孝先生所藏冊尾鈐童銓私印白文方印佛庵朱文方印是此書後歸童佛庵也孝先初名孝直仁和人明季諸生父灝崇禎甲戌進士曾知武陵縣居塘棲之落瓜里亂後遷居河渚易名曰介因改號狷庵積書千卷教童子五六人康熙戊寅秋一夕中風卒年七十有三銓字佛庵仁和諸生家北郭貧無餘貲性愛古書門攤市集所得多舊棄舊鈔收藏前賢小像至數十人

孫明復小集一卷 舊鈔本 怡府藏書

孫復

復字明復晉州人居泰山著春秋尊王發微錄自石介以下咸師事之年四十未娶丞相李迪以其弟之子妻之慶厯間范文正富鄭公薦於朝除國子監直講見氏讀書志載睢陽子集十卷此乃泰安趙國麟鈔撮本後附歐陽修撰先生墓誌銘及石

介記述曾寄先生文十三首詩六首有安樂堂藏書記明善堂珍藏書畫記兩印蓋怡邸舊籍也

孫明復小集一卷 紀氏鈔本

謹按 四庫全書總目孫明復小集一卷兵部侍郎紀昀家藏本宋孫復撰文獻通攷載孫復睢陽子集十卷宋史藝文志亦同此本出自泰安趙國麟家僅文十九篇詩三篇蓋從宋文鑑宋文選諸書鈔撮而成十不存一然復集久佚得此猶見其梗概云云此鈔本有紀昀曉嵐兩小印卷端鈐翰林院印當爲文達當日進呈本經館臣錄出發還本家之書也昀字曉嵐獻縣人乾隆十九年進士官至禮部尙書謚文達與陸公錫熊奉敕纂修 四庫全書撰爲提要進呈 御覽爲後學津逮士林以爲榮

徂徠文集二十卷 明鈔本 曹棟亭藏書

祖徠石介守道

介字守道兗州奉符人天聖八年進士初授嘉州判官遷直集賢院出通判濮州宋史有傳少有大志文章倔強勁質陳古今治亂成敗以指切當時無所忌諱作慶厯聖德詩分別邪正專斥夏竦後以疾卒竦因誣以詐死北走契丹請剖棺驗視賴朝廷察其誣得免歐陽公既誌銘其墓又爲讀徠徠集詩二章附於後徠集者以先生嘗躬耕徠徠山下故以名集晁志載二十卷與此合目錄之外每卷前仍列篇目接書正文有棟亭曹氏藏書長白敷槎氏堇齋昌齡圖書印嘉蔭簪藏書印朱學勤印修伯諸圖記

宋蔡忠惠文集三十六卷外紀十卷

明萬厯刊本

明後學吳興蔡善繼伯達甫校

公諱襄氏蔡莆田人仁宗賜字曰君謨仕至端明殿學士宋史

有傳宋藝文志與文獻通攷載公文集卷數參差不能遽定乾道四年王十朋知泉州屬興化軍鍾離松編爲三十六卷鈐行元明間書已就湮萬厯中莆田盧廷選始得鈔本侍御陳一元析爲四十卷梓於南昌此萬厯丙辰興化太守蔡達甫刻本仍依原第而附以徐興公勛所輯別紀十卷版心作雙盃齋三字有晉江何喬遠溫陵黃國鼎史繼偕諸序及善繼自序槧印不苟可珍也

鐔津文集二十二卷

明宏治刊本

藤州鐔津東山沙門契嵩撰

契嵩姓李氏字仲靈藤州鐔津人慶厯間居杭州靈隱寺皇祐間入京師兩上萬言書仁宗賜號明教大師陳舜俞爲撰行業記集有輔教篇皇極論中庸解論篇又雜著書啟狀序志記銘碑記表辭述題書贊傳評等文終以非韓三十篇及與楊公濟

晤中晦山游倡和詩凡文十九卷詩二卷附諸師序讚題疏一卷爲明宏治十二年慈菴沙門嘉禾如卷所刊按萬厯丁未徑山寺僧刊止十九卷支那本止十八卷居易錄所稱僅十三卷皆不如此本之完美

蘇魏公文集七十二卷

舊鈔本

右宋丞相魏國公溫陵蘇頌撰其子攜所編宋志陳錄同作七十二卷前有紹興九年顯謨閣學士汪藻序稱公以博學治聞名重天下者五十餘年卒用儒宗位宰相一時高文大冊悉出其手論政之得失則開陳反覆而極於忠論民之利病則援據該詳而本於恕若其講明經術之要練達朝廷之議下至百家九流律歷方技之書無不探其源綜其妙者在公特餘事耳此本精鈔無一懈筆不易觀也

古靈先生文集二十五卷附錄一卷

影宋本

密直學士累贈少師宋史有傳古靈山村在侯官縣西南百里
集因以名凡二十五卷嗣子紹夫編紹興五年李綱序建炎二
年陳公輔跋同里徐世昌先刻於閩紹興三十一年四世從孫
輝又命仲子陴排次年譜鋟木於贛附葉祖洽行狀孫覺墓誌
劉彝祠堂記富鄭公薦狀陳瓘詩其首卷冠以紹興元年求賢
手詔及熙甯經筵論薦司馬光等三十三人章稿按宋刊有二
本一每半葉十行行二十字一每半葉十行行十八字間有缺
翻漫文此帙影寫十八行本與槎客吳氏罍里瞿氏所藏宋本
同惟無使遛語錄一卷耳吳焯繡谷薰習錄云古靈集論樂劄
子與詳定禮文並有闕文所定銅木尺二條亦失焉案元豐元
年詔陳襄李清臣王存黃履何洵直孫諤楊完就太常寺攷訂
禮文沿革又詔陸佃張璪詳定復以前後所進獨詔楊完編類

成郊廟禮文三十卷襄於攷禮曰撰銅木尺度一卷其後劉幾范鎮楊傑更制大樂則襄所制已經更改是以史志闕之今劉子無闕文銅木尺二條亦在焉繡谷所藏者或小草齋謝氏傳鈔二十卷本也

青社黃先生伐檀集二卷

明嘉靖刊本

鮑以文藏書

前甯州知州婺源葉天爵刊行知州九谿喬遷訂補

皇祐五年青社自序云江夏黃庶字亞夫年二十五以詩賦得第一歷佐一府三州未有一事可以自見素餐昭昭暇日發稿草散亡居多取其完者題曰伐檀集且識其愧云庶慶厯二年進士知康州庭堅其子也陳直齋曰世所謂山魃水怪著薛荔之詩集中此體庭堅詩律蓋有自來卷末有諸孫犇營兩跋向附刻於山谷集中葉前喬後皆知甯州者有歛西長塘鮑氏知不足齋藏書宛陵李之郇藏書二印

司馬太師溫國公正公傳家集八十卷

明初刊本

龔蘅圖周雪客

宋司馬光撰光字君實陝州夏縣人以蔭入官年二十舉寶元元年進士神宗卽位擢翰林學士御史中丞後除樞密副使力辭去元祐初拜門下侍郎繼遷尙書左僕射卒年六十八謚文正建炎中配享哲宗廟庭文集乃公手自編次公薨子康相繼歿屍以道得而藏之中遭黨禁南渡後始授之謝克家而劉嶠爲之序題曰溫國公文正司馬公文集有進司馬溫公文集表一篇此書黃丕烈百宋一廬珍藏者當是紹興初刻士禮居藏書題跋云周香巖所藏舊鈔本亦爲卷八十而標題則曰司馬太師溫國文正公傳家集末有泉州公使庫印書局淳熙十年正月內印造到云云又有嘉定甲申金華應謙之并有門生文林郎差充武岡軍軍學教授陳冠兩跋皆云公裔孫出泉本重刊與此本標題泉州本台前有劉隨序當因嚆而誤也然相傳

已久每葉二十行行二十字較之乾隆時刊本爲勝多矣末有康熙壬辰三月十又三日仁和後學龔翔麟監誦終卷鈐有翔麟小印首有龔衡圃祕笈之印又有周雪客家藏書一印

趙清獻公文集十卷

明成化刊本

宋趙忞撰忞字閑道衢州西安人景祐元年進士及第歷推官改御史彈劾不避權倖京師目爲鐵面御史加龍圖閣學士知成都以一琴一鶴自隨爲政簡易王安石用事忞屢斥青苗法之不便至和中以論陳執中事與范景仁有隙安石亦恨景仁言於上曰陛下問趙忞知其爲人他日神宗以問公對曰立皇嗣以安社稷可謂忠臣旣退安石以問公曰不敢以私害公卽此公之度量宏大矣凡三入蜀蜀大治性至孝縣令過勗榜其里曰孝弟里集詩文各五卷宋景足元年太末郡守天台陳仁玉訪得章貢所刊集本旁搜散佚以補刊之元至治元年蒙古

晉人僧家奴銓元卿又跋之及明成化七年三衢郡守馬鬼聞
澤於署後得舊刻黹跡更校謄補遺附以本傳神道碑雜文刊
爲此本視嘉靖間林有年楊準重刊者爲善矣有承恩壽士賓
桐之章

金氏文集二卷 舊鈔本

宋金君卿撰君卿字正敘江西浮梁人父諫議君溫叟曾鞏嘗
志其墓兄名君祐亦進士嘗與挾策野外有醉鬪致傷者仇人
執以告縣曰是金秀才呼僮毆之縣械繫而欲罪之吏具文案
上文爲大風捲去次日再上文風捲如故縣令驚怪釋之文正
范公出守鄱陽延致門館且榜其所作賦於郡庠以爲程式慶
歷二年登進士第皇祐二年官祕書丞五年遷太常博士熙寧
四年遷江西轉運判官明年提舉江西刑獄權提舉常平入爲
度支郎中終廣西轉運使嘗上封事乞建國根本所至興學校

教儒生詳議法律皆主平恕邃於易學著易說易箋臨川江明
仲學出於公求公遺稿編成十五卷號金氏文集久已湮失館
臣掇拾於永樂大典中釐爲兩卷末綴傳易之家一篇聊存箋
說之一斑仍冠以元祐六年富臨原序略存梗概焉

直講李先生文集三十七卷外集三卷年譜一卷

勝成化刊本
平王氏藏本

宛

後學南城左贊編輯後學廣昌何喬新校正

宋李觀撰觀字泰伯建昌南城人皇祐初以薦授右學助教終
太學說書文獻通考載觀退居類稿十二卷續稿八卷常語三
卷周禮致太平論別爲一集與今本異然陳氏書錄解題載肝
江文集三十七卷外集三卷則已同今本矣此書爲明正德乙
亥川南孫甫令南城時祀其祠拜其墓訪其後裔得希先希哲
育於庠更求遺文得鈔本多殘缺又得全集於夏東洲吏部版
已受漫貽卽此刻歟左贊字時翊邑人官吏部驗封司主事何

喬新字廷秀廣昌人景泰進士刑部尚書後死於土木之難前序已失有宛平王氏家藏募齋監定及重遠書樓鳴野山房諸印宛平王氏者王文貞公藏書印記也文貞諱崇簡字敬哉宛平人官至禮部尚書有青箱堂集子熙字子雍號智庭順治四年進士歷官保和殿大學士加少傅諡文靖父子同官尚書古今所少海內榮之家藏祕本甚多

直講李先生文集三十七卷外集三卷年譜一卷
後學南城左贊編輯後學廣昌何喬新校正知南城縣事健爲孫甫訂刊

此書卽重刻孫本前載祖無擇退居類稿序按無擇蔡州人曾知南康軍此序題南康後人刊刻之誤也前列成化六年陳鑑建昌新建祠堂記八年羅倫建昌府重修墓記並天順八年禮部公文正德戊寅孫甫刊成後序

陶邕州小集一卷 鈔本

永州陶弼商翁

別本題宋康州團練使祁陽陶弼撰商翁以軍功補官兩知邕州故以名集其詩善言風土山谷嘗志其墓

都官集十四卷 舊鈔本

宋陳舜俞撰

舜俞字令譽慶厯六年進士嘉禾人幼以文筆擅名中嘉祐四年制科厯官都官員外郎以言新法謫南康監稅宋史附張問傳末集三十卷爲其女夫周開祖所編蔣之奇爲序慶元中曾孫杞復刊於四明樓鑄作後序杞亦有跋今兩序一跋皆存而集則從永樂大典中輯出釐爲十四卷非其舊矣鈔寫極古雅新刻石室先生丹淵集四十卷拾遺二卷諸公書翰詩文一卷附年譜雜記 明萬厯刊本 梁山舟校藏

宋尙書司封員外郎充祕閣校理新知湖州軍州事兼管內勸農
事上輕車都尉文同著

按同字與可梓潼漢文翁之後故稱以石室先生皇祐元年進
士爲邛州軍事判官後歷知陵州洋州仕至太常博士集賢校
理元豐初出守湖州至宛邱驛卒宋史入文苑傳同未第時卽
以文章受文潞公知司馬溫公稱其襟韻瀟灑如晴雲秋月塵
埃不到世人但知其畫筆耳遺文爲其曾孫鶯所編詩則各以
所居東谷南幽臨邛廣漢陵陽漢中梁洋西岡爲別慶元乙卯
曲沃家誠之守邛州復取舊編釐正首以詞賦次樂府次古今
詩次雜文仍第四十卷拾遺文兩卷繫以諸公詩文譜其生平
出處彙爲全帙顧與可與東坡爲從表弟最爲厚善集中無與
東坡往還之作因避黨禍悉從芟削甚至易子瞻爲子平當東
坡倅杭曾送以詩有北客若來休問事西湖雖好莫吟詩殆早

知有詩禍也錢功父稱之爲仙宜哉慶元本世久無傳萬厯壬子知鹽亭事楚永蒲以懌重爲序刻冠宋史傳於前又列雲間王微一跋較內江李務滋所刻雖後二年然吳近蜀遙尤足珍也梁山舟侍講有朱筆校正之字

右別集類四